



## 對阿母的思念

阿母的頭髮 親像百日紅  
電一擺過一冬  
黑金閣自然  
是上蓋嬌噹噹

阿母的頭腦 親像簿仔冊  
一頁記一項  
阮的生日 拜拜的日子  
是佇咧上頭仔頁

阿母的心 親像青紅燈  
紅燈教阮斟酌看  
青燈教阮向前行  
是天頂上光的慈母星

阿母的話 親像萬年青  
一葉結一葉 一句接一句  
給阮鼓勵 擱給阮勇氣  
是阮上金的phuáh鍊

阿母的錢筒仔 親像不倒翁  
有時重重 有時空空  
是阮的所費 嘛是阮的註冊費  
是阮厝內上靈的土地公

### 創作理念

肉粽的芳味，一陣一陣傳入來，閣是五日節，每一擺的五日節，細漢和阿母鬥陣的形影，親像電影，一幕閣一幕浮在阮的眼前，阿母已經離開十幾冬，阮對阿母的思念，一冬比一冬閣較重，忍不住提筆將阮對阿母的思念寫做歌詩。  
這首阿母的歌詩，寫的是阮對阿母上蓋深的印象，這首歌詩親像溫泉水，予我溫暖閣予我勇氣，希望出外的囡仔，想起阿母的話，體會阿母的心意，會當淡薄仔解除心內的稀微。阮用上簡單的漢文來寫這首歌詩，自然押韻，鬥陣來唱阿母的歌，唱出囡仔的心聲，唱出咱對阿母的感謝。

李秀英

塗城國小教師

